



Иудын бэшэһэн хандалга

Амаршалга

1 ¹Эсэгэ Бурханай хайра дурада хүртэһэн, Иисус Христосой харьяалда байһан Бурханда дуудуулһан хүнүүд аа, таанадые Иисус Христосой зараса, Яковай дүү Иуда амаршална. ²Үршөөл хайра, энхэ тайбан ба хайра дуран таанадай дунда оршожо байг лэ!

Хуурмаг хургагшадһаа хэргылнэ

³Хүндэтэ аха дүүнэрни, бидэ бүгэдын абарагдаха тухай би бэшэхэ ханаатай байгаа. Тиихэ зуураа Бурханай зондо нэгэтэ, гэхэдэ хэтын хэтэдэ үгтэһэн хүзэгэй түлөө таанад тэмсэхэ ёһотойт гэжэ уряалан бэшэхэ хэрэгтэй гэжэ тоолоноб. ⁴Өөһэдынгөө харата хэрэгүүдые сагааруулха зорилготойгоор Бурханаймнай буян хэшэг тухай хургаалые хазагайруулдаг, буруу болгодог, манай Захирагша болон Дээдын Эзэн Иисус Христосые буруушаадаг хүзэг шүтөөнгүй зарим хүнүүд бидэнэй дунда шургажа ороо. Тэдэ зон хэһээлтэдэ орохо гэжэ Нангин Бэшэгтэ эртэ урдын саһаа хойшо бэшээтэй байдаг.

⁵Дээдын Эзэнэй өөрынгөө арадые Египедһээ гаргажа абарһан тухайнь, тиигээд тэрээндэ хүзэглэдэггүй зониие үгы хэһэн тухайнь ханагты. ⁶Эрхэ түрээ алдаад, байраяа орхихон Эльгээмэлнүүдые Бурхан харанхыда хэтын хэтэдэ гэнжээр хүлиһэн тухайнь ханагты. Тэдэ Эльгээмэлнүүд агууехэ үдэр зарга шүүбэридэ оротороо тэндэ байха юм. ⁷Тэдэндэл адли зальхай забхай ажамидаралтай Содом, Гоморро хотынхидой, хажуудахи хотонуудайнь зоной мүнхын галда шатан, аймшагтай саазада хүртэһэн тухай ханагты. Таанадай эдэ бүхэниие мэдэжэ байһаншье хаатнай, би хануулжа хэлээб.

⁸Тэдэнэй хэһээлтэ хүн бүхэндэ хэргылэмжэ болоно. Тэдэ зондол адли өөһэдынгөө үзэгдэлнүүдые баримталан, хуурмаг хургагшад

бээ бузарлуулна, засаг буруушаана, огторгойн хүсэнүүдые муушална. ⁹ Гэхэтэй сасуу Михаил гэдэг Бурханай ахалагша Эльгээмэлшье Моисейн махабад бэе тухай шолмостой арсалдахадаа, хорото үгөөр тэрэниие зэмэлжэ шадаагүй юм, тэрэ гансал: «Дээдын Эзэн шамайе хориг лэ!» – гэжэ хэлээ ха юм. ¹⁰ Харин тэдэ хуурмаг хургагшад ойлгохогүй юмэнүүдээ хорото үгэнүүдээр хараажа, хэлэгүй малдал мэтэ зүнгөөрөө мэдэдэг юмэнүүдээрээ өөһэдыгөө хосорооно. ¹¹ Тэдэнэр Каинай замаар ябана, Валаамда адли алта мүнгэндэ шунан, зониие буруудхана, Корейдэ адли зүрюу зан гаргаад, хосорно. Тэдэнэр гай зоболон амсахал. ¹² Тэдэ зон бузарта адли юм. Таанарай аха дүүнэрээрээ хамта хоол барихада, тэдэнэр өөһэд тухайгаал бодон, эшэхэ нюургүйгөөр гүзээгээ дүүргэн, таанадые бузарладаг юм. Тэдэнэр халхинда туугдаһан бороогүй үүлэнүүд юм. Тэдэнэр үндэһэтэйгөө абтажа хаягдаһан, голоороо хатаһан, намартаашье үржэлгүй модод юм. ¹³ Тэдэнэй бузар хэрэгүүд дошхон далайн долгиной хөөһэн мэтэ эли. Тэдэ мүнхын харанхыда байха табилантай, төөриһэн одод мэтэ. ¹⁴ Тэдэнэр тухай Адамай долоодохи үеын үри һадаһан болохо Енох иигэжэ уридшалан хэлээ: «Тоогүй олон гэгээнүүдтэйгээ хамта Дээдын Эзэн ерэнэ. ¹⁵ Бүхы хүнүүдые шүүхээе, харата хэрэгүүдэйн түлөө, өөрыень буруушаажа хэлэһэн зүрюу үгэнүүдэйн түлөө Бурханда хүзэглэдэггүй нүгэлтэниие шүүмжэлэн элирүүлхээе ерэнэ». ¹⁶ Тэдэнэр бүхы юмэндэ дурагүйсэһэн гэмэрлэдэгшэд, тэдэнэр ташаяангы хүсэлэнгүүдээ дахажа ажамидардаг, ёһорхуу омог үгэнүүдээр өөһэдыгөө магтадаг, алта мүнгэндэ обтожо билдагуушалдаг юм.

Нүхэдөө һэргылнэ, захяа үгэнэ

¹⁷ Хүндэтэ аха дүүнэрни, манай Дээдын Эзэн Иисус Христосой элшэнэрэй уридшалан хэлэһые һанажа ябагты. ¹⁸ Һүүлэй үедэ харатай хүсэлэнгүүдээ хангадаг, таанадые наада баридаг хүнүүд бии болохо гэжэ тэдэнэр таанадта хэлэдэг һэн. ¹⁹ Тэдэ зонһоо боложо хүнүүд эбээ таһалдаг, тэдэ зон махабад бэеынгээ хүсэлэнгүүдтэ хүтэлүүлэн, Нангин Һүлдэгүй ажамидардаг. ²⁰⁻²¹ Харин таанад, хүндэтэ аха дүүнэрни, Дээдын Эзэн Иисус Христосой хизааргүй үршөөлөөрөө таанадта мүнхын амидарал үгэхыень хүлэжэ байхадаа, өөһэдыгөө нангин хүзэг дээрэ һуурижуулан ургуулжа байгты. Нангин Һүлдын урмашуулгаар зальбаржа, Бурханда дуратай байгты. ²² Маргажа байһан зониие үршөөхые хэшээгты. ²³ Хүнүүдые хэхээлтын

Иудын хандалга 1

галхаа аршалжа байгты. Бусад зониие үршөөжэ хайрлагты, тиибэ-
шье тэдэнһээ болгоомжолжо, нүгэлөөр бузарлуулагдаһан хубсаһан-
һаань жэрхэжэ байгты.

Баяр хүргэжэ зальбарна

²⁴ Таанадые нүгэл шэбэлдэ унахаһаатнай аршалжа, өөрынгөө Ал-
дарай урда тээ хирэгүй сэбэр, баяртай юумэдые байлгажа шадаха,
²⁵ Дээдын Эзэн Иисус Христосоор дамжан бидэниие абарһан ори-
ганса Бурханда анханһаа эхилээд, мүнөө саг болотор хэтын хэтэдэ
алдар соло, хүр жабхалан, хаан түрэ, эрхэ засаг байһай! Болтогой!